



Կայուն զարգացման, ԲՍԿ և ռիսկերի հանձնաժողովի ձևավորում

ՉՊՄԿ տնօրենների խորհրդի 20.02.2026թ որոշմամբ «Չանգեզուրի պղնձամուլիբդենային կոմբինատ» ՓԲԸ Տնօրենների խորհրդի շրջանակում (կազմում) ձևավորվել է «Կայուն զարգացման, ԲՍԿ և ռիսկերի» հանձնաժողով: Հանձնաժողովի կազմում ներառվել են ՉՊՄԿ գլխավոր տնօրեն, տնօրենների խորհրդի անդամ Ռոման Խուդոլին, տնօրենների խորհրդի անդամ Նարեկ Բաբայանը, Գլխավոր տնօրենի տեղակալ, տնօրենների խորհրդի անդամ Արտյոմ Պետրոսյանը, Գլխավոր տնօրենի տեղակալ/կայուն զարգացման գծով տնօրեն Արմեն Ստեփանյանը: Տնօրենների խորհրդի կողմից «Կայուն զարգացման, ԲՍԿ և ռիսկերի» հանձնաժողովի նախագահ է ընտրվել խորհրդի անդամ Արտյոմ Պետրոսյանը: Հանձնաժողովի կազմի լիազորությունների ժամկետ է սահմանվել 3 տարին:

Հանձնաժողովն իրականացնելու է ՉՊՄԿ ռիսկերի կառավարման շրջանակի, կայուն զարգացման ռազմավարության, Բնապահպանական, Սոցիալական և Կորպորատիվ կառավարման (ԲՍԿ) կատարողականի ռազմավարական վերահսկողություն: Հանձնաժողովը զբաղվելու է ԲՍԿ համապատասխան վարկանիշների ուսումնասիրմամբ, ընտրությամբ և ներդրման օժանդակությամբ, ուսումնասիրելու է Կորպորատիվ կառավարման միջազգային լավագույն փորձը և գործիքակազմը, աջակցելու է դրանց ներդրմանը ու կիրառմանը Ընկերությունում: Միաժամանակ, Հանձնաժողովը խորհրդին աջակցելու է կայուն զարգացման հստակ թիրախների սահմանման գործում՝ ընդգրկելով աշխատանքի անվտանգությունը, շրջակա միջավայրի վրա ազդեցությունը, համայնքների ներգրավվածությունը և այլ գործառույթներ:

Ընկերությունում կայուն զարգացման լավագույն փորձի ներդրման նպատակով Հանձնաժողովը իրականացնելու է նաև ռազմավարության և քաղաքականության իրագործման հսկողություն, հանքարդյունաբերության իրավունքի պահանջների, կլիմայի ռիսկերի և հնարավորությունների մշտադիտարկում: Հանձնաժողովը միաժամանակ մշակելու է ընկերությունում արդյունավետ կորպորատիվ կառավարման և ֆինանսական կայունության, արտադրական անընդհատության և արդյունավետության, բիզնես դիմակայունության և գաղտնիության ռիսկերի կառավարման համակարգ, վերահսկելու է պոչամբարների և ամբարտակների անվտանգության, կլիմայի փոփոխության և բնապահպանական ռիսկերը: